

## E PENSO A CANDO

Sa terra s'est serrende  
 pro a mie  
 e abbaido da-e sutta de-a issa  
 sas baddes mias de sa Sardigna  
 pensende a cando, minore,  
 curria chena oriolos  
 gioghende in mesu s'erva  
 alta e fiorida.  
 Zente chi happe amadu e amo  
 agguademi a bessire fora  
 da-e custu interru primadiu  
 ca non poto lassare  
 sa lughe  
 chi m'hat donadu  
 dies de cuntentesa chena fine  
 e dies de anneu a rios.

E penso a cando  
 sas musicas de sos omnes mannos  
 m'han ninnadu su coro  
 in nottes de lugore,  
 a cando sas alvures  
 m'han ghiadu a cumprendere  
 sa forza de sa natura,  
 a cando sas pinturas mias  
 han coloridu s'apposentu meu  
 de chelos lontanos  
 e a cando so fuidu  
 chirchende sa paghe  
 de s'anima  
 bramosa de conoscher  
 sa vida.

E como so trovadu  
 da-e su tempus de oe:  
 a vintises annos  
 mi parzo unu 'ezzu  
 chi abbaidat su mundu  
 cun ojos istraccos.

## E PENSO A QUANDO...

*La terra si sta chiudendo / per me / e guardo dal di sotto di essa / le mie valli  
 di Sardegna / pensando a quando, bambino, / correvo spensierato /  
 giocando nel mezzo dell'erba / alta e fiorita. / Gente che ho amato e amo /  
 aiutatemi a uscir fuori / da questa precoce sepoltura / perché non posso  
 lasciare / la luce / che mi ha donato / giorni di felicità senza fine / e giorni  
 di sofferenza a fiumi.*

*E penso a quando / le musiche dei grandi uomini / mi han cullato il cuore /  
 nelle notti lunari; / a quando gli alberi / m'han guidato nel farmi capire / la  
 forza della natura; / a quando i miei dipinti / han colorato la mia camera /  
 di cieli lontani / e a quando son scappato / cercando la pace / dell'anima /  
 bramosa di conoscer / la vita.*

*Ed ora son sospinto / dal tempo di oggi: / a ventisei anni / 'mi sembro un  
 vecchio / che guarda il mondo / con occhi stanchi.*